

de ces nefz, qui estoient d'une grandeur desmesuree furent ostèz, & finalement ces colonnes furent enleuees de leur lieu (sans se rompre) & descendues en terre, exceptè toutes fois vne, ou estoit peinte vne deuote Image, & merueilleusement belle, de la bienheureuse Vierge Marie mere de Dieu, laquelle afin de pouoir enleuer saine, & sauue asseurement, quelque temps après la pierre fut sciee, avec toute la reuerence, qu'il conuenoit, & fut transportee dans l'Eglise neufue de S. Pierre, & mise a l'vn des sept autelz nouvellement deputèz, & a esté enrichie, & ornee de beaucoup, & diuerses pierres pretieuses. Après qu'on eut ostè les soubstementz, & descouuert le paue, & premierement en le descourant, & après en fossoyant pour faire les fondementz on trouua beaucoup de sepultures de marbre, & de terre cuiète des anciens Chrestiens en diuerses partz. Il fut aussy necessaire d'enleuer les autelz, & les sepulchres des Papes, qui estoient a ladiète porte de l'Eglise; avec ceste occasion particulierement descouurit ont le corps du Pape Boniface VIII. sans estre aulcunement corrompu, & gastè. On trouua le corps de diuers Sainctz, qui estoient soubz les autelz, entre lesquels, ceux des glorieux Apostres Simon, & Iude, de S. Processo, & S. Martinian martyrs, de S. Gregoire Pape, de S. Petronille, de S. Leon IX. de S. Boniface IV. Ceux aussy des SS. Leon I. II. III. IIII. se transporterent solennellement de leur ancienne place de S. Pierre, a l'Eglise neufue, & furent colloquèz ès sept autelz. Et semblablement les saintes reliques de la sacree Face, de la Lance de Longinus, & autres, qui estoient dans la vieille Eglise ont esté transportees a l'Eglise neufue de S. Pierre, & colloquees dans les niches, qui sont soubz la couppe, au dedans de laquelle on voit de tres belles figures en Mosaïque faictes par le Cheualier Ioseph d'Arpino peintre fameux, & ès autelz ont esté peintz diuers beaux tableaux par les plus celebres, & renommèz peintres. Ce tableau qui est a la Chapelle Gregorienne ou sôt peintz S. Paul, & S. Antoine premiers Hermites, est ouurage du Mutiano, celui qui est a la Chapelle Clementine, ou est peinte vne femme morte, qui defrauda l'Eglise, au temps de S. Pierre, est de celui de Christophle Pomaranci; le tableau qui est auprès a la mesme Clementine, ou S. Pierre est crucifié, a esté faict par Domitian Passignano; celui qui est a la Chapelle vis a vis de ceste cy allant a S. Marthe, ou est peinte la cheute de Simon Magus par Iean Sanese; l'autre tableau proche a cestuy cy ou est depeint S. Pietre, lors qu'il deliura vn pauvre homme